

四庫全書

子部

欽定四庫全書

子部
冊府元龜卷八十一

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣陳國遴

欽定四庫全書

冊府元龜卷八十

宋 王欽若等 撰

帝王部

慶賜第二

唐太宗以武德九年八月甲子即位於東宮大赦天下文武官五品以上先無爵者賜爵一級六品以下加勳一轉甲戌宴羣臣於顯德前殿賜帛各有差

貞觀二年五月丙申以夏麥大稔讌羣臣奏九部樂於

庭賜物各有差

六月庚寅皇太子治生宴五品以上賜帛有差仍賜天下是月生者粟帛

九月壬子宴羣臣奏九部樂賜帛各有差賜天下大酺三日慶有年也

十一月甲子宴羣臣賜帛各有差

四年二月甲寅赦詔賜天下大酺五日己亥幸溫湯賜從官帛有差

三月戊辰宴三品已上於林光殿賜物各有差

七月辛卯太上皇不豫有瘳詔曰尚齒崇孝德教所先
饗餼是加義超常等諸州都督刺史及文武官人老人
八十以上并孝子旌表門閭者並宜節級賜物以申饗
宴庶使萬國之內同此歡心施於四海皆知朕意壬辰
宴羣臣於芳華殿極歡而罷賜帛各有差十月幸隴州
詔岐隴二州八十以上鰥寡篤疾及舊任二州雜職佐
史以上賜物各有差百歲以上就加優恤辛丑校獵於

貴泉谷賜將士帛有差丁巳宴從官及武功父老賜帛各有差

十二月乙未皇太子誕育宴三品以上於臨華殿賜帛各有差

五年正月癸酉大蒐於昆明池甲戌宴羣臣賜從官帛各有差

己卯幸左藏庫賜三品以上帛各重負而出

四月甲辰宴羣臣賜帛各有差

八月己卯以大有年賜羣臣羊酒宴樂於其家

十一月己卯宴羣臣賜帛各有差

十二月丙午幸溫湯新豐賜高年帛有差

六年正月宴蠻夷及三品以上於百福殿賜帛各有差
三月戊辰幸九成宮丁丑詔行經之所八十以上及孝
子順孫鰥寡惇獨賜以粟帛

戊寅宴三品以上於九成宮丹霄殿賜從官帛各有差
四月癸卯醴泉出丹霄殿之西命公卿以上示之因置

酒於側賜帛各有差

七月宴三品以上於丹霄殿賜帛各有差

八月宴近臣於丹霄殿樓帝甚懼夜分乃散各賜錢帛各有差

閏八月帝在岐州皇太子來朝丙申宴東宮官屬賜帛各有差乙巳宴岐州父老賜帛各有差

九月幸慶善宮宴從官故老賜帛各有差

七年正月癸巳宴三品以上及州牧蠻夷於玄武門奏

七德九功之舞蠻夷十餘種自請率舞詔許之久而乃
罷賜帛各有差

八年二月丙午以皇太子承乾加元服降死罪以下五
品以上子為父後者賜爵一級天下大酺三日戊申宴
羣臣賜帛各有差

九年正月甲申皇太子承乾納妃蘇氏宴羣臣賜帛各
有差

十一年正月壬辰宴五品以上於兩儀殿賜帛各有差

戊辰宴長安父老於玄武門賜以穀帛

三月幸雒陽宮丙午宴從官賜物各有差癸卯宴雒陽父老於乾元殿賜以粟帛

十一月丙午宴五品以上及蕃夷於貞觀殿賜帛各有差

十二年二月壬子宴雒陽父老賜帛有差

十三年正月乙巳帝朝於獻陵三原縣人年八十以上及孝子順孫義夫節婦鰥寡惇獨有篤疾者賜物各有

差宿衛陵邑中郎將齊士員及三原令已下各賜爵一級

十四年正月己酉宴羣臣及吐谷渾王河源王慕容諾曷鉢於玄武門賜物各有差甲寅幸魏王泰宅賜泰府寮及同里老人各有差

十二月賜酺三日

十五年正月辛巳如雒陽所過州賜高年篤疾穀帛有差

四月乙未詔雒州篤疾及鰥寡惇獨不能自存者各賜米兩石五月壬申并州道士及僧父老等二百人詣闕上表稱太原王業龍興之地登封禮畢伏願臨幸帝賜宴於武成殿各賜物而遣之

十六年十一月西狩於武功甲子賜所幸六縣高年篤疾惇獨氈被穀帛各有差是日幸慶善宮召武功之郿城立節三時豐義四鄉士女七十以上及居宮側數百人賜宴畢賜帛各有差

十七年四月丙戌詔立晉王為皇太子又立晉王妃帝御承天門大赦文武職事九品以上及五品以上子為父後者各加一級鰥寡惇獨篤疾之徒量加賑卹賜天下酺

六月甲午并州父老百餘人詣闕稱陛下發迹太原皇太子疏爵晉藩臣等不勝慶幸今來奉賀帝賜宴及物以遣之

閏六月庚申薛延陀可汗突利設獻馬帝於慎思殿大

饗百寮盛陳寶器奏慶善破陳樂并十部之樂及種末
跳丸舞劍之技突利設再拜上千萬歲壽賜物各有差
十一月誕皇太孫宴宮寮於弘教殿賜物有差

是月以貞石表瑞赦制率土賜酺三日

十九年二月征遼所經州縣高年及鰥寡孤獨篤疾賜
粟帛各有差

十月征遼班師次營州戊申詔營州刺史父老及契丹
等蕃長以下各頒賜繒綿綾錦數千萬段癸酉至幽州

甲戌宴從官三品以上賜物有差

十二月辛酉帝在定州三品以上及四品中書門下四品以帝疾瘳詣閣上禮詔引文武五品以上預宴將夕乃罷賜物各有差

二十年正月帝自定州幸并州庚辰引從官及太原父老而宴之賜物各有差

二月詔遼海人無戰勲者汎加勲官一級乙未發并州庚申賜高年所過鰥寡孤獨篤疾粟各有差

七月帝疾愈宴五品以上於飛霞殿絲竹遞奏羣臣上壽極歡而罷賜綾錦各有差

八月幸靈州庚辰至涇州賜高年及鰥寡孤獨篤疾粟帛各有差

二十一年正月甲寅以鐵勒諸部并為州縣中外又安詔賜諸司及京城百姓大酺三日

二十二年正月己未奏十部樂會四夷君長於天成殿王公稱觴上壽賜帛各有差

三月丙辰至玉華宮賜行幸所過高年篤疾粟帛各有差

二十三年五月以甘露降大赦天下八十以上各賜粟帛鰥寡惸獨及篤疾者量加賑貸高宗以貞觀二十三年六月甲戌朔即位大赦天下内外文武賜勲官一級永徽三年正月丁亥率公卿耕於藉田賜羣官帛各有差

二月甲辰宴三品於百福殿極歡賜以錦綵各有差

三月丙辰御觀德殿陳逆人房遺愛等口馬資財為五
塚引王公諸親蕃客及文武九品以上大射賜之

七月丁巳立陳王忠為皇太子五品以上子為父後者
賜勲一轉大酺三日

六年正月壬申親謁昭陵還行宮詔左監門員外將軍
常基在此宿衛進爵一等陵令陵丞各加一階竝節級
賜物

二月乙巳皇太子忠加元服詔內外職事五品以上子

為父後者賜勲一級大酺三日

十月立武氏為皇后大赦天下八十以上老人各賜粟
二石綿三段百歲以上各賜粟五石錦十段鰥寡惇獨
篤疾不能自存者量加賑卹

顯慶元年正月辛未立代王弘為皇太子壬申大赦文
武職事九品以上五品以下子為父後者各加勲官一轉
亡官失爵並宜量叙諸年八十以上各賜粟帛鰥寡惇
孤篤疾之徒不能自存者量加賑卹賜天下大酺三日

已卯宴文武羣臣及朝集使蕃客京城老人八十以上
賜物各有差

十一月乙丑皇太子顯生京職事九品以上及朝集使
各加勲官一級仍賜宴賚物各有差

二年二月辛酉幸雒陽宮癸亥御貞觀殿宴從行文武
官及雒州父老宗姓等賜物有差詔百歲以上各賜氍
毹一具袍一領綿絹十段粟二十石仍遣使就家存問
九十以上各賜綿絹五段十月幸鄭州以高祖在隋嘗

守滎陽詔曰百姓免一年租賦八十以上老人及鰥寡
惇獨等賜粟帛各有差

四年十月皇太子弘加元服大赦天下文武官職事五
品以上子孫為父祖後者各加勲官一級大酺三日

閏十月辛巳以駕幸東都詔所經處八十以上老人賜
氈袍綿絹及粟有差

五年二月幸并州丙戌宴從官及諸親并州官屬父老
賜帛有差賜酺三日

八月癸未以討平百濟賜天下大酺三日

龍朔二年七月丁亥以皇子旭輪滿月賜酺三日京官五品以上并諸親等為誕皇太子上禮於是九品以上咸預宴樂賜物有差

麟德元年八月丁丑幸舊宅宴羣臣賜物有差

乾封元年正月戊辰朔有事於泰山壬申御朝觀岳牧二京留朝賀大赦改元諸行從文武官及見朝觀岳牧二京留守并邊要州都督刺史三品以下竝賜爵一等四品以

下加授一階諸老人八十以上者版授刺史司馬縣令
婦人版授郡縣君並節級量賜粟帛天下百姓年二十
以上八十以下賜爵一級丁丑詔諸行從文武官入見
朝覲諸王岳牧二京留守及守捉邊要長官三品以上
前賜爵一等者宜更加為二等四品以下九品以上前
加一階等者七品以上宜加二階八品以下更加勲官
一轉諸非行從內外職事官三品以上加爵一等四品
以下各加一階

四月甲辰至京師是日御景雲閣宴羣臣設九部樂頌
賜繒綵各有差

總章元年十月癸丑文武官獻食賀破高麗帝御玄武
門之觀德殿宴百官設九部樂極歡而罷賜各有差
二年九月幸岐州以高祖嘗為扶風太守故曲赦岐州
仍賜高年衣服粟帛各有差

咸亨四年七月庚午皇太子新宮成帝親逆太子入宮
五品以上及諸親竝從宴會奏樂極歡而止賜物有差

十月駕在九成宮乙未皇太子納妃裴氏禮畢曲赦岐州大酺

上元元年八月壬辰追尊宗廟大赦改元大酺三日帝御含元殿東翔鸞閣觀之時京城四縣及太常音樂分為東西兩廂

二年正月勅内外文武官職事四品五品任經十年已上未得階及六品以下出身經十五年以上歷職清勤無殿犯者宜令所司具以名聞其有廉能著稱清苦奉

公不須限以居職年月亦以名聞於是各賜一階

三年三月甲辰自汝州溫湯還東都詔免汝州田租之半八十以上老人節級賜帛

儀鳳三年七月丁巳宴百寮及諸親於九成宮之咸亨殿日晏而罷賜綵物有差

永隆元年八月乙丑立英王哲為皇太子改元大赦大酺三日

二年二月辛巳特賜京官九品以上大酺三日

永淳元年二月癸未以太子誕皇孫滿月大赦改元大
酺三日

弘道元年二月改元大赦老人年八十以上并婦人並節
級量賜粟帛孝子順孫義夫節婦表其門閭終身勿事
鰥寡孤獨篤疾不能自存者量加賑給見任內外官五
品以上經四考及守五考經三考六品以下計滿三考
政有清勤狀無私犯者各加一階

中宗神龍元年正月丙午即位大赦内外文武官加兩

階三品以上加爵二等入五品等特減四考大酺五日
二月甲子立妃韋氏為皇后大赦天下內外官預陪位
者賜勳一轉大酺三日

九月壬午帝親祀明堂禮畢制京文武三品以上賜爵
一級四品以上各加一階外文武官九品以上賜勳一
轉皇親嗣王郡王仍許佩金魚袋內外職事官三品以
上及四品清官并中書門下五品官父已亡者並量加
追贈自弘道已前經任相三年已上及秦府晉府寮佐

四品以上并食實封功臣雖經罪責不至破家子孫無任京官者特宜優與一官英府周府舊寮五品以上子孫亦宜准此天下百姓為父後者各賜爵一級大酺三日

十一月壬子帝謁太廟告謝受尊號之意大赦天下京官文武官及朝集使九品以上加一階三品以上賜爵一等外官九品以上賜勳一轉天下賜酺三日

二年十月戊戌至自東都十一月乙巳大赦天下從官

文武官九品已上賜爵

景隆元年九月受尊號禮畢赦詔改元文武官三品以上賜勲一轉

二年二月皇后言衣箱中裙上有五色雲起久而方歇帝令畫工圖其狀以示百寮仍大赦天下內外五品以上官母妻各加邑號一等十一月己卯安樂公主降武延秀禮畢大赦賜酺三日

三年正月癸酉幸薦福寺賜從官帛有差

八月己巳幸安樂公主山池宴從官賜繒帛有差

十一月乙丑南郊大赦文武官及應集考使別勅陪位
官邊州都督刺史諸軍大使副三品已上賜爵一等四
品以上加一階應入三品者三品減四考五品減三考
聽入外文武官賜勳一轉天下大酺三日

十二月甲午幸新豐之溫湯從官賜勳一轉睿宗初為
安國相王景隆四年六月庚子夜臨淄王平韋庶人辛
丑相王奉少帝御安福門樓大赦内外文武官三品以

上賜爵一等四品以上加一階應入五品不限以年考
四等以下及諸親賜勳三轉

唐隆元年甲辰即位大赦天下制內外官三品以上各
加爵一等四品以下各加一階七月己巳冊皇太子大
赦天下內文武官九品以上子承父後者各賜一轉
景雲二年四月壬寅大赦天下京官四品以下加一階
外官賜勳一轉三品以上各賜爵一等天下大酺三日
八月乙卯以高祖舊宅枯柿樹重生天下賜酺三日

太極元年正月戊子藉田乙丑大赦改元內外官四品以下加一階三品以上賜爵一級天下大酺三日

延和元年五月戊寅親祀北郊改元內外官陪見大禮者賜勳一轉大酺五日

八月庚子傳位於皇太子甲辰大赦改元為先天內外官三品以上賜爵一級四品以下賜勳兩轉五品以上子為父後者賜勳一轉天下大酺五日

玄宗先天元年九月庚午御長樂門加諸王公主實封

各有差三品以上各賜爵一級四品以下各加一階

二年七月誅左僕射竇懷貞等大赦天下文武官三品以下賜爵一級四品以下各加一階

九月己卯宴王公百僚於承天門賜物有差

開元元年十二月庚寅朔大赦改元內外官賜勳一轉
二年正月丁亥立皇太子大酺三日

五年二月甲戌行幸至東都制曰朕自臨天下未至於
雖雖二京出游蓋惟帝典五載來巡肇於即事念茲扈

從持有加恩南北衙應從官三品以上各賜物四十段
四品三十段五品二十段六品七品十五段八品九品
十段從飛騎萬騎各賜物五段雞坊小兒賜物三段三
衛檢校監門直長引駕等發京宿衛執事不闕者簡日
優量其置頓營幕橋道等使各賜物遞加從官一等仍
與中上考緣路刺史上佐縣令祇承頓事并專知客各
准從官吏與賜亦與中考衛士掌關幕士等各賜物兩
段

六年正月甲子隴右節度郭知運獲吐蕃獻俘特詔曰
王者六師必存止殺國之主柄且貴先賞今吐蕃背盟
我軍獻捷執訊獲醜以捨於平人歸馬休牛不資於國
用利以和義思與卿大夫共之其馬及犛牛等竝賜京
文武五品以上清官及朝集使三品者所繇節級分與
十月癸亥帝將還西京御樓河南及懷汝鄭父老賜帛
有差

十一月辛卯至自東都丙申親謁太廟下詔内外官三

品以上有廟者賜絹三十匹以修祭服俎豆緣謁廟亞
獻邠王守禮終獻宋王憲各賜絹三百匹夾侍岐王範
薛王業各賜絹二百五十匹自餘行禮及供三品以上
賜絹一百六十匹四品一百四十匹五品一百二十匹
六品一百匹七品八十匹八品六十匹九品四十匹鹵
簿六引官各減一等押仗官又減一等攝官依本官給
有無充諸使者加一等兩京文武官并朝集使諸方道
表一品七十段三品六十段四品五十段五品五十段六品七

品四十段九品三十段行從者加一等皇親諸親准品等禮儀置頓營幕使各賜物一百段副使八十段判官及修定儀注官各減賜一分之二行所州縣刺史上佐縣令等各准行從官與物其給賜人應兩處以上請者從一多紀為准有廟官之賜聽無給緣謁廟有所修造專當官及當頓官始末不絕者各賜一中上考行事齊郎及權補充者各賜物十段昇階者各賜十五段三衛飛騎萬騎并仗內無品人等賜五段十月正蕃衛士等

各賜三段

七年十一月乙亥皇太子入國學行齒胄禮丙子詔曰
儒道惟百王之政元良乃萬國之貞屬太學舉賢賓庭
貢士當其謁講故行齒奠所以宏風闡教尚德尊師宜
有頒錫以成光寵陪位官一品宜賜五十疋二品三品
四十疋四品五品三十疋六品七品二十疋八品九品
十五疋緣行禮及別職掌者各遞加一等六品以下五
疋為等五品以上十疋為等坐主加二等學生賜物三

疋待舉者及諸方貴人各賜五疋

八年正月甲子朔皇太子加元服丙寅宴百官於太極殿詔曰皇太子以守器之重有成人之量為陽和肇歲甲子惟日加乃元服循於舊章慶因雷洊歡洎雲上王公卿士中外寮案布以慈惠廣茲頒賜應在會官一品一百疋二品九十疋三品八十疋四品六十疋六品五十疋七品四十疋八品九品二十疋諸州都護都督刺史上佐諸軍及副使亦同在會例宜以當處物給

九年三月戊午宴朝集使賜物有差

十一月庚午冬至大赦天下内外官九品以上加一階
三品以上加爵一等大酺三日

十二月甲午宴朝集使賜物有差

十年正月乙巳御含元殿宴羣臣賜帛有差巳酉命婦
朝會賜帛有差二月丁丑幸東都至望春頓頒賜從官
及將士等束帛有差

十一年正月己巳發東都北巡狩制其行幸所至耆老

各賜物三段庚辰幸潞州詔曰朕巡狩晉陽觀風問俗肆覲羣后存問百年諸侯待於境者仰惟故事今停蹕潞州勞以牛酒其外州刺史及迎駕父老道士僧尼等遠來至此頗亦艱辛宜竝令預會刺史賜物四十疋父老以下各賜物三疋癸巳行幸北都詔太原府預宴官共賜物二千疋父老及吏人等共賜物一萬疋諸老年八十以上賜物五段版授上縣令仍賜緋九十以上賜物七段版授上州長史賜緋百歲以上各賜物十段版

授上州刺史仍賜紫

二月壬子祠后土於汾陰之睢上太史奏榮光出河休
氣四塞徘徊遠壇日揚其光有司奏脩壇掘地獲古銅
鼎二其大者容一斗色皆青又獲古軌長九寸上有篆
書千秋萬歲字及長樂未央字又有赤兔見於壇側制
曰自古受天之命作神之主崇德祀地盡孝配親存乎
禮經不可闕也朕承累聖之緒仗卿士之力方隅清謐
宇宙乂安北狩并都南轅汾上覽漢武故事修葺舊祠

時惟仲春地氣萌動將先政本為農祈穀齋戒惟寅粢
盛惟潔仲尼曰吾不與祭如不祭豈非躬盡孝敬以致
神祈乎而經始壇壇寶鼎出地奠茲幣玉榮光塞河將
何以幽答神心上膺靈貺朕又惟焉今大典克舉美祥
允洽自天之祐豈予一人思與百辟同茲嘉慶亞獻邠
王守禮終獻寧王憲各賜物七百疋申王撫岐王範薛
王業各賜帛五百疋餘升壇官三品以上賜爵一等四
品以下各加一階應入三品五品見任四品以上官先

授三品四品以上階經三十考者六品以上官先授五
品六品以上階經十六考者令所司勘責奏聽進止諸
緣大禮有職掌官賜勲兩轉餘陪位官賜勲一轉中書
門下三品六尚書御史大夫食實封三品以上功臣各
與一子官其立功萬騎身亡沒者雖預創業不見盛時
念功思舊情有感惻竝令所司檢勘亦各與一子官改
汾陰縣為寶鼎縣官同升壇官例賜一階

十一月戊寅親祠南郊大赦天下制升壇行事官及供

奉官三品以上賜爵一級四品以下賜一階内外文武
官及致仕并前資陪位者賜勲一轉親王公主各與一
子官其諸軍節度大使及三都留守雖不陪位資寄既
重特宜同升壇官例百歲老人賜帛五段粟五石縣令
至其家存問給付亞獻邠王守禮終獻寧王憲各賜物
一千匹侍中源乾曜中書令張說兵部尚書同中書門
下三品王暉各賜物五百疋三王後賜物一百疋二品
三品八十疋四品五品六十疋六品七品四十疋八品

九品三十疋郡王縣主各賜物八十疋天下賜酺三日

京城五日

十二年二月戊申大酺辛亥詔曰大酺之會與人同歡
或慮遠方觀者來往狼狽其四夜竝宜開坊門府縣金
吾嚴加捉搦

三月庚午宴朝集使於紫宸殿賜物有差

十三年東封十月庚午至濮州河南北五十里內父老
皆獻牛酒還其牛酒各賜帛二疋遣之

十一月壬辰封禪禮畢大赦天下詔内外文武官三品以上賜爵一等四品以下賜一階邠王守禮寧王憲岐王範薛王業各與一子三品官公主嗣主郡主縣主各與一子官其應行從文武官加階之外竝賜勲兩轉孔子後褒聖侯優與處分天下致仕官各依本品賜一季祿及束帛諸蕃侯王酋長來會禮者各加一官天下賜酺三日丁酉徐曹亳汴許仙豫等州父老獻牛酒還其牛酒各賜帛二疋

十二月己巳至東都京兆父老及道士僧尼三百餘人詣闕拜賀共賜帛三百段遣之

十五年五月丁丑是日端午宴羣臣於武成殿各賜衣一襲

十一月庚子御含元殿宴羣臣賜帛有差

十六年十一月丙午御含元殿宴羣臣賜帛有差

十七年十一月謁橋陵畢大赦諸州父老百歲以上賜帛十段九十以上賜五段八十以上賜三段獻陵昭陵

定陵官使并管陵縣官各別加一階內外賜文武官三品以上加爵一等四品以下賜一階亞獻皇太子鴻賜物二千疋終獻慶王潭賜物一千疋邠王守禮寧王憲薛王業各賜物八百疋忠王浚隸王治鄂王浟光王滉等各賜物七百疋中書門下賜物五百疋開府王毛仲賜物三百疋皇親五等以上諸親三等以上及文武百寮各賜物有差

十八年正月丁巳親迎春於東郊詔賜亞獻皇太子鴻

賜物二千疋終獻寧王憲賜物一千疋文武百官及有
職掌等各賜束帛有差率土之內賜醕三日

十九年十一月壬子幸東都勅親王賜物八十疋嗣郡
王六十疋一品二品五十疋三品四十疋四品五品三
十疋六品七品二十疋八品九品十段三衛引駕細引
飛騎萬騎各四段彊騎弩手幕士主膳供膳及諸色白
身人等各三段知頓使知營使各六十疋知頓御史四
十疋知騎御史及知頓判官知營幕官賜物各加一等

突厥吐蕃使共賜物五百疋令鴻臚等據蕃望高下節級分付供頓州百姓所緣頓差科及充夫匠雜祇供人等宜放今年地稅應定供頓縣官各與一中上考

二十年二月諸州朝集使還宴之朝堂送之賜帛各有差

十一月北巡狩庚申祀后土畢大赦天下諸州耆老百姓以上賜粟五石八十以上賜粟三石亞獻皇太子鴻賜物二千疋終獻慶王潭賜物一千疋邠王守禮寧王

憲薛王業各賜物一千疋忠王浚以下各賜物三百疋
裴光庭蕭嵩弼亮朕躬宏益思遠不有優異何殊等夷
加階賜爵之外各與一子官仍各賜物三百疋二王後
及長公主嗣主郡主縣主各賜物二百疋行從文武官
並節級賜物升壇官三品以上特賜一階應入三品五
品官階相當不限考數緣大禮有職掌官賜勳三轉內
外文武官三品以上賜爵一等四品以下各加一階致
仕官賜物有差從蕃客共賜物五十疋管壇一鄉百姓

給復二年武德初功臣每有大慶必存追遠業參運始而義合賞延其子孫沉翳無在朝者宜令勘責即與官唐元立功等艱難之際誠効益深言念其功豈忘終始其三品以上各賜一子官五品以上各賜紫金魚袋有亡沒者優贈與官仍與一子官兩京留守京兆河南尹四大都督府長史諸軍節度副大使准行從官例處分率土之內賜酺三日

二十一年五月戊子以皇太子納妃詔京文武九品以

上賜勲一轉諸司緣禮會祇供官等更加一轉五禮使
兵部尚書兼中書令蕭嵩特封徐國公禮會使黃門侍
郎同中書門下平章事韓休特與三品禮會使少府監
馮紹賜紫金魚袋皇太子舅尚輦奉御趙廻遵特與三
品官前右威衛曹騎趙廻進特與五品及五品官皇太
子侍讀侍書等各加一等階其皇太子諭德潘肅特與
五品官太子妃通事舍人薛愆特與五品及五品官今
日應預會官等各節級賜物即宜領取宴慰者所以宣

其情頒錫者所以將其意公卿百辟庶知朕心

二十三年正月乙亥藉田禮畢亞獻皇太子鴻賜物二千疋終獻慶王潭邠王守禮等各賜物一千疋忠王浚以下各賜物三百疋汝陽郡王淳以下各賜物二百疋裴耀卿張九齡李林甫自其翊贊誠有忠益頒賞以序等數須優各與一子宮賜物三百疋二王後各賜物一百疋長公主各與一子宮仍各賜物二百疋嗣王郡主縣主各賜物一百五十疋京文武官九品以上三都留

守諸道採訪使及節度使賜物有差管藉田縣令更賜物六十疋京文武官及朝集使諸道節度採訪使新除五品以上官未赴任畿縣令見在陪位者三品以上賜爵一級四品以下加一階皇親諸親并内外文武官九品以上各賜勳一轉蕃官應陪位者共賜物五十疋都城之內賜酺三日

九月辛巳宴朝集使於朝堂賜物有差

二十四年八月壬子千秋節御廣遠樓宴羣臣賜物有

差又召京兆父老等宴之勅竝宣坐食食訖樂飲兼賜少物宴訖領取

十月甲子自東都還至陝州詔行從飛騎萬騎三衛引駕監門各賜物五段兵曠掌閑及諸色當蕃人各賜物三段緣路供頓刺史縣令及專知官各賜一中上考行從有職掌武官賜勲一轉

二十六年正月丁丑親迎春於東郊禮畢制亞獻忠王興宜賜物一千疋終獻穎王璩及邠王守禮寧王憲各

五百疋慶王琮以下及長公主郡縣主二王後京文武
官賜帛各有差天下諸州父老宜令所繇長官量賜酒
肉務存優養

七月己巳冊忠王璵為皇太子大赦天下制内外文武
職事官九品以上各賜勳一轉五品以上子為父後者
亦賜勳一轉其忠王府官及侍讀侍書除普賜之外三
品以上賜爵一級四品以下各加一階仍並即與改轉
緣冊命行禮官各賜物有差今月番見上飛騎萬門直

長三衛駕細引執扇黃衣長上等各賜勲一轉曠騎番
兵各放免一番天下父老八十以上各賜粟三石帛三
段百歲以上賜粟五石綿帛五段竝加版授率土之內
賜酺三日

二十七年二月己巳加尊號大赦詔皇太子璵男及慶
王琮以下男宜竝封授官邠王守禮寧王憲各與一子
三品官其内外文武官三品以上賜爵一級四品以下
各加一階長公主公主及嗣王郡王各與一子官郡主

縣主各放一子出身二王後及諸方蕃客宜各賜物諸
致仕官量與進改依前致仕天下父老百歲以上版授
下州刺史婦人版授郡君賜粟五石綿帛五段九十以
上版授上州司馬婦人版授縣君賜粟三石綿帛三段
八十以上版授縣令婦人版授鄉君賜粟兩石綿帛兩
段京城父老等宜共賜物三千段僧道等賜物一萬疋
率土之內賜酺五日

二十八年八月己未以降誕之日御花萼樓宴羣臣賜

帛有差

二十九年五月帝夢玄元皇帝告以休期畫真容分布天下制曰今者真容應見古所未聞福雖始於邦家慶宜均於士庶其親王公主郡縣主及内外文武官等並量賜錢至休假之辰宜以素飧用申慶樂諸道節度使及將士等亦准此其兩京及諸州父老亦量賜錢同此懽宴其錢以當處官物充

天寶元年正月改元大赦天下耆老八十以上者宜委

州縣官每加存問仍量賜粟帛内外文武官九品以上各賜勲兩轉

三月丙申合祭天地於南郊制文武官三品以上加一爵四品以下加一階

三年十二月癸丑親祀九宮貴神禮畢詔天下耆老百歲以下賜綿帛五段粟三石八十以上三段粟兩石仍令郡縣長官存問給付亞獻太子璵宜賜物二千疋終獻慶王琮一千疋正衣夾侍各五百疋親王各三百疋

新封建郡王及國公一百疋賢妃三百疋長公主各三百疋公主各二百疋嗣郡王各一百疋中書門下三品竭心翊戴引益實多各與一子官如先已授官量與一人改轉内外文武官三品以上賜爵一級四品以下各加一階一品賜物七十疋三品以上六十疋五品以上賜物四十疋六品以下二十段諸道節度使各賜物一百疋三京留守及二王後各八十疋採訪使各六十疋諸蕃客共賜二千疋其唐元功臣締構之初竭其忠款

錄加念舊情所不忘普恩之外更加一階其身沒者各
贈一官皇親五等以上及九廟子孫諸親三等以上未
出身其前資者選日稍優與處分見任者更賜勳兩轉
應天下賜酺三日

六年正月戊子親祀南郊禮畢詔天下耆老百歲以上
賜綿帛五段粟三石八十以上綿帛三段粟二石仍令
所在長官存問各即分付亞獻太子璵賜物二千足終
獻慶王琮賜物一千足京文武官各賜帛有差天下賜

醕三日

七年五月冊尊號畢詔曰因親設教式本於人倫自葉流根必逮於營養內外文武職掌官有五品以上其父祖見在無官者宜各授一官仍聽致仕其祖母見在准母例處分京官五品以下正員如父母已沒未有官者亦宜追贈所司勘會即與處分王澤無私豈殊於中外天瑞有慶頻屬於京華寬大之典則以普覃施惠之恩特申曲被其京城父老宜各賜物十段七十以上仍

版授本縣令其妻版授縣君六十以上版授本縣丞天
下耆老百歲以上版授下郡太守婦人版授郡君九十
以上版授上郡司馬婦人版授縣君八十以上版授縣
令婦人版授鄉君仍並即量賜酒麪內外見存文武官
九品以上宜各賜勳兩轉其京文武官見在京及致仕
并陪位官諸方通表使及月蕃官等一品賜物一百疋
二品三品八十疋四品五品五十疋六品七品三十疋
八品九品二十疋兩京留守各八十疋其節度採訪使

并諸官充使未廻者竝同在京例賜物皇太子璵更宜
賜物二千疋慶王琮以上各賜物有差率土之內賜酺
三日

八年閏八月受冊尊號大赦制曰朕永惟風教漸冀還
淳至於宏貸之名亦思復古其天下百姓大夫戶頭者
宜各賜爵一級天下父老竝量賜酒麵內外見任文武
職掌官三品以上賜爵一級四品以下各加一階其有
文武官在京及諸色陪位官通表使等賜帛有差率土

之內賜醕三日

十年正月甲子有事於南郊大赦天下京官五品以上
正員清資官階相當并五品以上正員外清官父母先
亡沒無官號者竝與追贈又父有封爵合傳授子孫或
緣申請遲違准式遂停承襲如有此色自開元以來宜
令所司審加勘責灼然合襲者特宜許襲太清宮道士
各賜物三十段陪位道士共賜物五百段亞獻皇太子
賜物二千足終獻榮王琬賜物一千段文武百官及有

職掌各賜束帛有差率土之內賜酺三日

十三年二月受冊尊號大赦制曰朕尊崇先謚霜露增感於以孝思無忘錫類其內外見任官官階俱是三品以上父未有五品官及無官已亡沒者宜各贈五品官及母無邑號者亦與追贈其見任四品五品清官官階俱是五品以上者亡父母先無官號亦准此追贈天下父老百歲以上版授本郡太守婦人版授郡君各賜綿帛五段粟三石八十以上版授本縣令婦人版授縣君

各賜綿帛兩段粟二石太清宮闕聖祖先居頻告休徵
屢貽啟迪不有優異豈表殊常其本宮道士宜各賜物
三十段道門威儀五虛貞賜物五十段陪位大德各賜
物二十段因心推崇增上美謚惟官統職必在正名今
以太常尊事宗廟安可例署為名禮不逼尊情期達敬
五陵署改為臺獻陵臺等五令及丞並升一階以彰崇
奉亞獻皇太子璵賜物一千段終獻榮王琬賜物五百
段其餘各賜階爵有差其郡守縣令職守親人必在公

勤用康黎庶凡所推擇皆竭乃誠寵錫之門須甄異等
普恩之外太守等竝賜爵一級縣令賜勳兩轉庶其勉
勵以表朕心其京文武官一品賜物一百疋二品八十
疋三品七十疋四品五品五十疋六品七品各三十疋
八品九品二十段東京北京留守節度採訪使并京官
准勅出使未迴者所賜物並同見在例左相陳希烈純
粹之道載穆朝廷文儒之風式瞻師表且叶和時令翊
贊昇平柔嘉其德克壯元老與一子五品官賜物五百

尺攝太尉莫瓚上冊書寶冊讀冊右相楊國忠宜與一
子三品仍與一子五品官更賜物五百段左僕射安祿
山既押登歌又押寶冊與一子官更賜物四百尺攝太
尉張均太清宮祠及脩儀注等使普恩之外又賜物一
百尺武德功臣及貞觀初宰輔等緬想忠義感會風雲
用集大勲肇興王業其有子孫零落冠冕陵夷無任官
者宜令所司勘責依資與一人京官唐初功臣續參締
構錄勞念舊每寘於懷普恩之外宜放一子出身所司

依資與一官率土之內賜酺三日

三月丙午宴躍龍殿門賜右相楊國忠絹一千五百疋
綵羅三百疋綵綾五百疋左相陳希烈絹三百疋綵羅
綾各五十疋餘三品八十疋四品五品六十疋六品七
品四十疋

十四年八月天長節詔南衙九品以上并京兆府畿令
等宜共賜物二萬疋左右龍武軍各賜一千疋其唐元
功臣言念勲舊宜異常倫兩軍各賜物二千疋餘各有

差天下侍老各量賜米

肅宗至德元年七月即位於靈武詔天下耆壽各賜帛
五段諸百姓本道採訪使差郡縣存問四方將士各賜
馬一疋六品以下賜帛十段天下寺觀各度十人內外
文武官九品以上各加兩階賜勳兩轉三品以上賜爵
一級

八月上皇至蜀郡大赦天下左相韋見素進封幽國公
特加一階兼文部尚書平章事房瑄中書侍郎平章事

崔圓竝賜特進三品門下侍郎平章事崔渙賜四品驃
騎大將軍內侍監知內侍省事渤海郡公高力士加開
府儀同三司進封齊國公左龍武大將軍潁川郡公陳
玄禮加開府儀同三司進封潁國公朝臣扈從衣緋者
賜紫綠者賜緋竝量加進封

十二月戊午帝御丹鳳門大赦天下詔五品以上清資
官及三品以上官上郡太守父見任無官及官卑竝與
五品官及祖先亡沒者贈一人官祖母亡沒亦贈邑號

天下父老八十以上版授有差竝賜緋魚袋内外文武
三品以下各加一階應叙三品五品量加兩考蜀郡鳳
翔扈從官九品以上更賜勲一轉溥天之下賜醕五日
乾元元年二月乙巳受冊尊號大赦改元詔内外文武
官有三品以上各賜爵一級四品以下及四方通表使
各加一階五品以上有父歿者各賜勲兩階

四月甲寅郊廟禮畢乙卯御丹鳳門大赦天下詔曰其
成都府元從聖皇功臣及靈武元從功臣并收兩京將

士京留守諸道節度採訪使普恩外三品以上賜爵一級四品以下加一階門人賜勳三轉二王三恪各與一子官内外文武官三品以上賜爵一級四品以下加一

階

八月甲辰天長節上皇於金明樓宴百官賜綵五百疋十月甲辰冊成王俶為皇太子大赦天下詔文武官三品以上賜爵一級四品以下各加一階五品以上官子為父後者賜勳兩轉頃緣國用不足頒賜未周今所鑄

新錢數盈於萬其京官文武兩品以上及常參官六軍將士東北京留守及諸道節度將士等各賜物有差其唐元功臣成都元從及朕元從功臣等普恩之外更賜一爵四品以下更加兩階其在靈州及寧州至鳳翔者仰所司類例更遞加一等皇親及諸色陪位人各賜勲兩轉其鴻臚蕃客共賜絹一千疋應緣冊禮職掌要重者及撰冊昇寶官禮官等普恩之外賜勲兩轉其禮儀使特賜一階副使普恩之外賜爵一級勅文有不該者

所司類例奏聞

二年九月丙寅帝降誕日宴百官於宣政殿賜絹三千疋

上元元年閏四月己卯御明鳳門大赦改元詔内外文武官賜爵各有差其六軍及飛龍閣廡加賜物其成都靈武元從扈從遮加有差見在諸軍各加錄賞物陣亡將士優加褒贈行人家口所在賑給

二年九月壬寅大赦制自今以後但稱元年以今年十

一月為歲首每月以所建為數內外官三品以上賜爵一級四品五品各加一階六品以下賜勳兩轉成都府及靈武元從普恩之外三品以下更加賜爵一級四品更加一階六品以下更賜勳一轉京文武官等賜物各有差天下父老先版授者改與版授未版授者與版授元年建卯月辛亥大赦制内外文武官三品以上賜爵一級四品以下各加一階成都靈武元從功臣三品以上更賜爵一級四品以下更加一階其京清資正員文

官五品以上武官三品以上并兩省供奉官御史諸州
刺史並諸道節度以下三品以上父母亡沒未經追贈
者並量與追贈

冊府元龜卷八十

欽定四庫全書

冊府元龜卷八十一

宋 王欽若等 撰

帝王部

慶賜第三

唐代宗以寶應元年四月即位五月丁酉大赦詔諸州
刺史與一子官刺史縣令入五品減兩考內外文武官
三品已上賜爵一級四品已下各加一階諸州刺史父
母在無官者與致仕官及母邑號已亡歿者追贈天下

子為父後者各賜勲一轉

廣德元年七月壬子受冊尊號大赦改元制内外文武三品已上賜爵一級四品已下加階仍各賜勲兩轉文武正員常參官并諸州刺史父母無官邑者宜與致仕及邑號賜者更與改贈

二年二月乙亥親拜南郊戊子御明鳳門大赦内外文武三品已上賜爵一級四品已下各加一階仍並賜勲兩轉武德元從功臣勲業特崇子孫沈翳者委所司勸

責各與一人官成都靈武元從普恩之外三品已上更賜一級四品已下更加一階寶應功臣普恩之外三品已上各與一子六品官賜爵一級四品已下各加兩階更賜勳兩轉五品已上官子為父後者賜勳兩轉副元帥光弼子儀各與一子三品官并階諸道節度使各與一子五品官并階都防禦使及經略等使各與一子六品官并階去歲行幸陝州六軍英武威遠威武寶應射生衙前射生左右步軍等并内外文武百官扈從到行

在者三品已上與一子官四品已下各加兩階自陝州
至上都已來置頓使及州府長官普恩外各與一子出
身置頓使判官已下緣路縣令及專知頓使各加一階
其六軍神策寶應射生衙前射生及左右步軍英武威
遠威武等諸軍左右金吾將士緣大禮扈從及在城留
後者共賜金錢五萬貫鴻臚蕃客共賜錢一千貫儀王
及彭王已下諸王男未有官者並准舊例與官其已封
為郡王國公者及永穆長樂已下長公主及諸郡縣主

并嗣王郡王各與一子官皇親五等已上諸親三等已上各與一子出身二王之後各與一子官應緣大禮應升壇殿行事者普恩之外更與一子官應在太清宮郊廟諸色職掌者及冊皇太子行事官撰冊并書冊文及檢校造冊官普恩之外三品已上賜爵一級四品已上加一階仍賜勲一轉

永泰元年正月癸巳朔御舍元殿大赦改元應見立仗諸軍將士等宜共賜錢五萬貫

大歷元年十一月甲子日長至御舍元殿大赦改元其
立仗將士等宜賜物五百疋

德宗以大歷十四年五月即位六月己亥朔御丹鳳樓
大赦天下内外文武官三品已上賜爵一級四品已下
加一階致仕官同見任天下百姓為戶者賜右爵一級
内外將士及方面連帥並加官及勲封等在城諸將士
各賜緡帛

建中元年正月辛未拜郊廟禮畢御丹鳳樓大赦天下

內外文武官賜爵及階勲天下子為父後者賜勲兩轉
興元元年正月癸酉朔帝在奉天大赦改元詔應赴奉
天并進收京城將士并賜名奉天定難功臣身有過犯
減罪三等子孫過犯減罪二等

六月癸丑詔興元府見任官各加兩階耆老與版授本
縣令仍賜緋興元鳳州界內知頓脩橋閣路官等委嚴
震類例功效聞奏當與甄獎

七月丙子次鳳翔詔鳳翔府耆壽侍老八十已上各與

版授刺史仍賜紫餘並與版授上佐仍賜緋府縣知頓
官考滿日放選是月辛卯御樓大赦内外文武及致仕
官三品已上賜爵一級四品已下加一階仍并賜勲兩
轉司徒兼中書令晟與一子五品正員京官侍中瑊與
一子六品正員京官駱元光尚可孤韓遊環戴休顏各
與一子七品正員官諸道節度使及行在都知兵馬使
都虞候扈從左右金吾六軍大將軍各與一子八品正
員官都團練使觀察使各與一子官收京城將士超八

資改轉已甄叙者更與超三資扈從及收京城將士及常參官祖父母在先無官封量授致仕官及邑號已亡者與追贈扈從將士三品已上賜爵兩級四品已下各加兩階賜勲三轉諸道刺史普加恩外賜爵一級諸道鎮軍及行營將士三品已上賜爵一級四品已下加一階宣示中外咸知朕意

貞元元年正月丁酉朔御舍元殿大赦改元扈從奉天及收城將士以府庫空竭減六宮百司經費據見漕運

財賦隨到者賞賜之

十一月癸卯日南至南郊禮畢詔内外文武見任及致仕官三品已上賜爵一級四品已下加一階天下諸使軍將士三品已上亦賜爵一級四品已下加一階白身人賜勲三轉應奉天興元元年扈從立功并收京城將士食封者各隨文武與一子官餘並加兩階仍賜勲三轉其文武百僚應從到興元府者五品已上賜勲三轉其五品已下賜爵一級六品已下加一階合入三品五

品者不拘考限聽叙其中五品已上父母未經追贈者
並與追贈大長公主各與一子七品官嗣王郡王縣主
各與一子出身應陪位皇親三品已上賜爵一級四品
五品加一階六品已下及常選散官者簡選日優與處
分應緣大禮職掌行事官及留守副留守內行事中官
等三品已上各賜爵一級四品已下加一階仍並賜勲
兩轉介公鄜公各與一子官如無子孫賜物一百疋神
策六軍殿前射生英武威武威遠皇城左右金吾衛使

等諸軍諸使將士御樓立仗及守本仗者并諸道節度
下隨使赴上都帖仗將士等宜共賜物十三萬段仍賜
勲兩轉

四年正月庚戌御殿大赦諸軍立仗將士共賜帛十萬疋
陪位蕃客賜一千疋天下刺史與一子正員官戶口增
加田疇廣闊者長吏加一階縣令減選優與處分

十一月庚午日南至南郊禮畢詔内外文武及致仕官
并諸軍將士等三品已上賜爵一級四品已下加一階

大禮行事官各加一階立仗將士及守本營者共賜帛十八萬端疋

九年十一月乙酉日南至郊祀禮畢大赦天下内外文武見任及致仕并諸軍諸使將士等三品已上賜爵一級四品已下加一階將士白身者賜勳兩轉應緣大禮職掌行軍法駕南郊後留守副留守及太倉左藏庫及陪位官等三品已上更賜爵一級四品已下加一階其郊壇宮廟行事官各賜勳兩轉皇親應陪位者三品已

上賜爵一級四品已下加一階及諸色應陪位官等各
賜勲兩轉親王大長公主公主嗣主郡縣主郅公介公
鴻臚蕃客神威六軍及諸使應緣大禮宿衛御樓立仗
及守本軍本營者諸道節度在京帖仗將士賜物有差
宰輔及在方鎮者祖父各與追贈東都留守諸軍節度
觀察都防禦都團練經畧鹽鐵轉運使左右神策神威
六軍等統軍大將軍英武威遠軍使戶部侍郎判度支
及京文武三品已上正員官尚書省四品官中書門下

省御史臺五品官父在未有官者量授檢校官有官者
加一階母在未有邑號者授邑號已有邑號者更進邑
號父母亡歿者各與追贈應諸軍防秋兵馬使及別勅
定名充邊地兵馬使等備禦勤勞所宜優異其父在未
有官者各授檢校官母在未有邑號者各授邑號邊軍
鎮守及諸道諸軍防秋將士經三周年未改轉者宜與
甄叙

順宗以貞元二十一年正月即位赦制内外文武見任

及致仕官并諸道將士等賜爵加階賜勳有差二王三恪褒聖侯各與一子官大長公主嗣王等各與一子官及出身有差宗子中有才用者委宗正卿以名聞量才叙用皇王等已上親賜爵加階有差陪位者年十五已上并放出身諸州府長官及京長參官父見在未有官者並與五品致仕官及階父歿者母存者與邑號父母亡歿量與追贈陝州元從寶應功臣興元元從奉天定難功臣賜爵勳有差亡歿者與追贈中書門下節度使

東都留守度支鹽鐵等使京兆尹觀察招討等使及神
策神威金吾六軍將士大將軍英武威遠鎮國軍使隴
右經畧軍使節度留後各與一子官有差其神策神威
六軍將軍大將士英武軍等使并與加官神策神威六
軍英武威遠營左右金吾及皇城將士及緣御樓立仗
將士等賜物及爵階有差應東宮官及侍讀侍書授在
正月二十六日已前者國喪已來職掌行事及冊命官
受顧命撰制詔及脩冊文并寫制詔官等賜爵加階勲

進改有差蕃客等共賜物一千八百七十疋義武軍節度使下官健在城立仗共賜物三千八百四十五疋立仗將士等量加改轉內侍省及內坊官正諸道進奏院及奏事官賜爵階勳有差百姓九十已上版授及賜各有差又冊皇太子詔文武官常參及諸州府長官子為父後者賜勳兩轉

憲宗元和元年正月丁卯御丹鳳樓大赦内外文武見任及致仕官神策六軍諸道將士等各賜爵階勳有武

德已來功臣子孫與官及出身文武常參官觀察節度
團練經略使刺史六軍大將等父母亡歿與封贈至德
已來任宰輔與追贈及謚陝州奉天元從功臣恩外更
賜勲爵

二年正月辛卯有事於南郊還御丹鳳樓大赦天下制
內外文武見任及致仕官諸軍將士等以品秩節級賜
勲爵文宣公及二王三恪公主諸王與一子官及賜物
有差諸軍立仗及在本營節級賜物應緣大禮職事官

並賜階爵天下百姓高年者賜米麥羊酒及版授官

四年十月冊鄧王寧為皇太子大赦天下文武常參官
及諸州府長官子為父後者賜勲兩轉應緣冊禮行事
官賜階及勲爵有差鄧王府官量與進改

七年十月壬寅冊遂王為皇太子庚戌制文武常參官
及諸州府長官子為父後者賜勲兩轉應緣冊皇太子
行事官加階賜勲爵有差文武常參官及陪位官並宗
子親賜勲一轉遂王府官量與進改

十三年正月乙酉御舍元殿受朝賀畢御丹鳳樓大赦
詔二王三恪及文宣公各賜物五十疋神策六軍威遠
金吾及皇城等緣御樓立仗將士等及在城內蕃客各
賜布有差中書門下及文武常參官諸道節度觀察神
策諸軍等使祖父母父母節級與贈官封存者量與致
仕官及邑號天下百姓高年賜束帛羊酒有差

十四年七月己丑御宣政殿受冊尊號大赦天下內外
文武見任及致仕官三品已上賜爵一級四品已下加

一階仍賜勲兩轉神策六軍金吾皇城威遠等諸軍應
在城內蕃客並節級賜物侍中韓弘讀冊官崔羣讀寶
官皇甫鏘並各加一階已至三品者賜爵二級撰冊文
官崔羣與一子正員官其餘應職掌行事官加階賜爵
賜勲有差寶應興元功臣各賜勲爵天下百姓高年者
頒賜有差

穆宗以元和十五年正月即位二月丁丑御丹鳳樓大
赦詔内外文武見任及致仕官三品已上賜爵一級四

品已下各加一階諸道軍將士等普恩之外賜階爵有
差二王三恪文宣公及公主縣主嗣王節級賜與一子
官及出身宗子才行者委以名聞奏仍委中書門下量
才叙用皇王等已上親皇太后二等已上親並賜階爵
中書門下諸道節度使諸州府長官東都留守及京常
參官諸軍使等父母並節級與追贈父母存者與官封
已經追贈者更與改贈在城諸軍將士節級賞賜仍加
階爵京西京北及鎮武天德八道節級都防禦使下及

神策一十二鎮將士等共一十八萬六千七百餘人都
賜物一萬八千八百餘疋皇太后諸親委中書門下量
等第節級優賞文武常參官及外官職事五品已上有
母者並加邑號如已至郡太夫人者許迴授周親應緣
皇太后冊禮職事官並節級賜物天下百姓有祖父母
父母高年者賜束帛城內蕃客等並節級賜物今年正
月二十八日至閏正月三日宮苑諸門守捉西內立仗
將士等量加改轉應內侍省及內坊官正等並賜勲爵

九月辛丑幸魚藻宮大張樂觀競渡貴戚左右洎倡優
角抵市肆百戲皆厚頒賜賚

十一月制王承元願赴闕庭宜令諫議大夫鄭覃往鎮
州宣慰其四州之內有高年孤獨或承平遺老夙覩皇
風或孤獨廢疾不能自存者差官就問量給粟帛

長慶元年正月辛丑郊裡禮畢大赦天下內外文武及
致仕官三品已上賜爵一級四品已下各加一階陪位
白身人賜勳兩轉陝州奉天興元功臣更賜爵有差身

歿未經追贈應緣大祀移仗宿衛御樓立仗將士普恩之外賜爵勲有差仍准舊例賜錢物二十萬四千九百六十端足貫大禮職掌行事官及留守等更賜勲爵及加階升壇殿行事官更特加一階應在城內蕃客等賜物有差天下百姓高年者賜米及綿絹有差

三月以盧龍軍節度使劉總請代詔曰劉總已極上台仍移重鎮兄弟子姪各授官榮大將賓寮亦宜超擢百姓復一年宜賜軍士錢百萬貫以內庫錢充仍令宣慰

使給事中薛存慶親諭朝旨與節度使丞相張弘靖計
會大將判官甄獎未及有父母在者並具名列上郡縣
中有殘破甚者量便宜優卹管內高年惇獨廢不能自
存者差官就問給賜粟帛

七月壬子受冊尊號禮畢御丹鳳樓大赦内外文武見
任并致仕官賜官爵有差神策六軍金吾威遠皇城將
士普恩之外各賜勳三轉大長公主長公主公主嗣王
郡王縣主神策六軍金吾威遠皇城等諸軍將統軍以

下并將士等長行立仗及守本軍本營者各賜物有差
鴻臚禮賓院應在城內蕃客等並節級賜物陰山貴女
來迓天孫會王明庭克觀盛典念吾妹之將遠於禮賓
而宜加其回鶻公主別有賜物攝侍中讀寶官戶部侍
郎平章事杜元穎讀冊官中書侍郎平章崔植各加一
階撰冊文官與一子正員官冊奉寶授書玉冊官書寶
官各加兩階進寶綬進冊進中嚴外辨禮儀贊道押冊
寶綬昇寶冊官各加一階其餘應職掌行事官并寫制

書官太常脩撰儀注禮官并內定行事中使三品已上
賜爵一級四品已下加一階仍并賜勲兩轉鑄造玉冊
并填金字造寶裝寶官等各賜物五十段尊師重傅有
國常經李逢吉常綬薛倣丁公著等普恩之外各加一
階如已至三品四品者賜爵一級天下百姓年九十已
上委所在長吏量加存問

二年十二月丙子冊景王為皇太子癸丑詔文武常參
及諸州府長官子為父後者賜勲兩轉緣冊太子攝太

尉稱賀攝侍中承旨宣制進中嚴外辨攝中書令讀冊授冊各賜爵一級其行事職掌官及書寶引冊寶昇舉冊寶儀禮使禮官等三品已上賜爵一級四品已下加一階撰冊文官特加一階仍並賜物有差導引官各加一階鑄造冊寶及禮生等賜勲有差文武常參及陪位官并宗子諸親賜勲一轉

敬宗以長慶四年正月丙子即位詔曰朕以寡昧祇膺寶位載懷悼懼豈所克堪而羽衛爪牙禁營師旅晝巡

夜警協力悉心自始御哀至於踐祚忠勤匪懈誠節用
彰將圖錫賚務欲豐厚屬頻年旱歉御府空虛如聞邊
上將士至今未給衣賜永言軫慮深切寤懷霑卹之時
所期均濟兩軍官健各宜賜絹十足錢十千畿內諸鎮
各賜絹十足錢五千軍吏及城內諸軍賞物節級有等
仍於內庫更出綾絹共三萬疋度支充邊軍春衣并天
下州府賦稅如要蠲放者并委所司約此數均勘取濟
凡百將士宜悉朕懷

元和十五年穆宗即位賞賜過差
左右神策軍各給錢五十貫諸軍

及外鎮所降無幾將吏之錫又倍焉至是宰臣請量物力稍循往例時議美之

宣賜宰臣及給事中中書舍人錦綵金銀器有差以冊日行事寵錫也又賜諸內長官及扈從至左右軍供奉官錦綵銀器有差

文宗以寶曆二年十二月乙巳即位賜左右軍中尉樞密使供奉內官等錦綵銀器有差戊申帝始聽政尊聖母為皇太后賜行事官錦綵銀器有差宰臣翰林學士錦綵銀器有差以脩冊文宣教令故也賜少陽院宿直

官健共四百人錢各二十五貫絹二十五疋於槐林卓
隊左右軍各五千人絹各十五疋錢十五貫又長行各
錢十貫絹十疋左右三軍長行絹各十疋錢五貫左右
金吾皇城威遠飛龍官健等各絹五疋錢五百文

太和元年正月乙巳御丹鳳樓大赦改元其去年十二
月九日立功將士普恩之外三品已上更賜爵一級四
品已下更加一階其赴難軍使兵馬使都虞候將士等
仍各與改轉名銜聞奏

七年八月甲申冊魯王永為皇太子制文武常參官及諸州府長官子為父後者賜勲兩轉應冊禮行事官賜爵加階賜勲并賜物有差魯王府官未經進改者量與進改

開成元年正月辛丑朔御宣政殿改元大赦應內外文

武進階加爵有差

臣欽若等曰自武宗至哀帝無實錄帝紀惟書大赦及錄文言簡赦文未

獲故會昌已後慶賜之事多闕文

昭宗龍紀元年正月癸巳朔御武成殿大赦改元中外

文武臣寮進秩頒爵有差

天祐元年閏四月帝遷都雒陽乙巳御光政門大赦改元應脩都諸色工匠人夫軍將節級軍人百姓等共賜錢一十萬貫以見在東都諸道上供物充委全忠分給其軍將仍委具名銜聞奏量材酬獎又應自陝州執事掌儀仗隨駕馬軍及樓下立仗將士等共賜錢五萬貫以見在東都錢充應內外文武常參官節度觀察防團刺史並與追贈追封先已有者更加封贈其諸道藩鎮

牧守并委中書門下第其功績進改處分禮儀使御營使各與進階

後唐莊宗同光元年四月即位改元大赦應六軍及行營馬步蕃漢諸道將校并賜功臣未有官者超一資與檢校官已有官者亦超一資如官已高者與加爵邑如曾封爵者即給一子六品正員官其長行兵士並賜功臣應將士等並勒逐處各等第優賞

二年二月己巳朔南郊禮畢大赦應自來立功將校兵

士等皆久經戎陣備覩辛勤並宜各轉官資仍加賞給
應南郊掌儀仗隨駕官員及樓下立仗將士及河南將
校兵士等亦各賜等第優賞應藩鎮使臣各賜一子出
身仍封功臣名號諸道留後刺史官高者加爵一級官
卑者加官一資

三月辛亥詔隨駕收復汴州及扈從到雒及南郊立仗
都將已下至節級長行軍將等朕自削平中夏掃蕩羣
凶被介冑以征行歷星霜而扈從凡經百戰盡立殊功

永念丹心真同赤子若無旌賞豈表恩榮其都將官自
司空已下者宜並賜協謀定亂佐國功臣自僕射尚書
常侍至大夫中丞宜並賜忠勇拱衛功臣其初帶憲銜
宜並賜忠烈功臣已有功臣名者不在此限其節級長
行軍將並宜賜扈蹕功臣又詔昨皇太后爰自北京歸
於大內旋膺典冊正位宮闈載詳邦國蓋規合有命婦
貢表宜稽邃古以示新恩應内外文武官妻可據品秩
高卑各封邑號

明宗天成二年五月勅朕自恭承景運祇荷丕圖念寰
海生靈錄勲賢骨肉保家莫尚於孝報國莫大於忠忠
孝兩全古今所重在朝文武臣寮并諸道節度刺史等
有父母者宜徧加恩澤使天下為人父者知感為人子
者知恩競揚家國之風顯著君臣之道

三年正月己丑先准天成二年五月十二日勅中外臣
寮及諸道節度使等有父母者並許加恩奉勅凡居臣
下盡抱公忠共為朝廷各榮家族具慶者繼頒恩渥俾

耀晨昏既亡者宜漏泉局以光封樹應中外羣臣及諸道節度防禦團練刺史等父母亡歿者並與追贈加封四年二月北面馳報今日三日收復定州舉酒徧賜侍臣喜除腹心之疾賜教坊絹五百疋內臣進馬稱賀丙午百辟入賀馮道從容言曰元惡既除猶望陛下安不忘危即太平非遠戊申宴羣臣於玉華殿樂作王晏球馳報已獲王都首級生禽契丹禿餒等二千餘人百官就班稱賀崔協酒酣不能扞蹈踏於地命左右掖之方

興不乂協卒宴罷賜物加等

長興元年二月郊裡禮畢下制曰朕恭荷丕圖獲申大禮益股肱之叶力環衛之輸忠將士等扈從乘輿警巡晝夜咸彰勞瘁深所嘉稱各示頒宣以明酬獎宜令三司依等第勘會指實人數指揮支給其諸道州府如本處有絹帛准價折支無見在錢物即就便支遣兼差使臣各往逐處宣賜仍下六軍諸衛准此告諭是月宴羣臣於長春殿百寮各賜鞍馬銀器分物有差酬郊祀行

事也五月丁丑詔賜皇后冊禮使馮道副使兵部尚書
盧質錢絹衣著銀器鞍馬有差

三年正月白波新脩軍營帝駕幸觀之稱旨賜部署軍
吏等物有差八月戊申受冊尊號庚戌以馮道撰玉冊
文李愚書寶劉昫書冊各賜絹二百疋銀器百兩秦王
從榮延光延壽各賜絹五百疋銀器百兩金帶一銀鞍
馬一宣徽使馮贇孟漢瓊絹三百疋銀器百兩鞍轡馬
一匹客省使宋敬瑄樞密直學士李崧絹百疋蓋盃一

侍衛指揮使康義誠已下三人六軍統軍李從昶已下
六人各賜錢二十千諸軍都指揮使人各十五千諸軍
指揮使人各十千副指揮使人各七千都頭人各五千
副兵馬使人各四千親直捧聖等散指揮使嚴衛軍將
等人各三千龍武神武羽林六軍馬步兵士人各二千
雜作諸軍將士人各一千徽號赦後恩賞也又賜侍衛
都將康義誠絹二百疋馬一匹馬步都將安彥威張從
賓各絹百疋馬一匹捧聖嚴衛都將宋洪寶皇甫遇絹

各百疋

十月丙寅勅曰朕聞君臣一也善否同之比之於人心安則體逸方之於木枝盛則葉繁朕自父天子民宗文祖武輔弼上憑於廊廟獻替次賴於縉紳四海無波敢自矜於清晏一人有慶思共樂於雍熙近又允副羣情增崇大號雖中外元輔已議序遷而文武庶寮未聞普及而况咸著恪居之績悉堅欣戴之誠將顯示於獎酬當廣頒於渥澤應在朝文武臣寮並宜加恩其有八月

四日已後遷官者不在此限時帝欲徧與百寮轉官而馮道等以為轉官須論資考乃奏叙階勲而已

愍帝以長興四年十一月癸卯即位已酉詔中外將士賜物有差

應順元年正月改元諸藩鎮文武臣寮皆次序加恩帝嗣位覃慶澤也是月宴將相百寮於廣壽殿賜幣馬有差二月詔兩班常參官各加階進爵從改元赦書恩例也

末帝清泰元年四月即位大赦應内外文武臣寮即鎮
州府等使刺史文武職員將校並與加恩應自鳳翔扈
駕員寮凡主兵主事者各賜功臣名見在京隨駕并諸
道馬步將士并與等第優給并從別勅處分隨駕前資
文武官寮并量材任使是月詔禁軍鳳翔城下歸明將
校賞給龍武都指揮使安審琦羽林都指揮使馬萬楊
思權嚴衛都指揮使尹暉各二馬一駝錢七十貫諸軍
廂指揮使壕寨使各一馬一駝錢五十貫諸軍指揮副

指揮使一馬一駝錢四十貫軍使都頭一馬錢三十貫
諸軍軍使副兵馬使至長行契丹直錢三萬軍頭十將
至軍人各十貫其元在京城守營及新招軍都人廂軍
十將至官健各錢十貫又詔曰應勸進諸選人前京兆
府武功令龐濤而下四百九十有四人方在京都遺茲
際會既同勸進宜示獎酬其前賓州縣官及黃衣進選
人近日緣少闕員難於減選候合格日各超一資注擬
行事官亦於注擬時優與處分長流人已歸本貫即以

赦書節文處分攝試官推巡令錄宜并許比三轉出身
判司衙推主簿比明經出身各守選限自今年始合格
日與初官宗子未有出身者與出身有出身者同選人
例處分給與憑據

七月詔鄭州防禦使宋敬塘宿州團練使潘環潁州團
練使孫鐸亳州團練使康文審洺州團練使田武密州
刺史張錢郢州刺史武廷翰懷州刺史周光輔商州刺
史侯益并叙進爵邑從恩例也文武兩班崔居儉而下

一百七十有一人各轉階一級或賜勳一轉或進爵一等示新恩也

晉高祖天福元年十一月己亥即位于北京大赦改元詔曰文武官寮等各輸推戴之誠宜示獎酬之道應在京文武官寮及軍府將校并勸進官等兼前資官內自五月後來未曾分掌職任并各與遷轉官資自五月後已來曾受官者不在此限其軍府諸色職掌將吏等已及押衙職者并與加官未及押衙職者各與遞遷職次

應超魏府行營及係侍衛諸軍將校等并已加恩外所有六軍及諸道本城并替換在諸處將校未加恩者凡執干戈皆為社稷雖守役或分等次而傾心盡著勤勞且被渥恩各升官秩用獎輸忠之効俾堅禦侮之誠其六軍及諸道州府本城并替換在諸處將校未加恩者宜令并與依資轉官仍令六統軍及諸道州府據前項軍都自副將已上分析名銜申奏是月甲申至雒都壬午詔曰賞罰二柄激勸萬方儻稽甄獎之恩何荅勤劬

之効應扈駕及相州歸順軍都並與重加優賞但緣宮
內燒焚庫藏虛乏宜令三司疾速抽徵諸道稅物以充
賞給其指揮使節級等并與超轉官資五月後來已曾
授恩命者亦與依資轉官高懸朗日臨照必被於遐陬
大扇仁風亭育罔遺於纖芥應天下歸順節度使刺史
下賓席郡職及將校等委中書門下各與改轉官資
二年正月庚申詔曰有晉開國新命臨人宜弘不二之
規以廣無私之化應在朝中外臣寮及節度團練防禦

使刺史留守司及州府縣官等宜并與加恩擢材委任
不問常例

十月勅應追尊四廟行事官等追尊四廟式展盛儀行
事庶官合頒溥澤貴承光寵共贊孝思宜令銓司准元
勅磨勘如守選年深過格及已合格指受赴任不得并
次一選兩選者先與注官加欠三選四選月限不滿衝
替下許非時注擬者即相次注官仍頒各依資序如不
依元勅指揮欠選數多者即仰都具奏聞

三年四月諸道藩侯郡守皆等第加恩

六年八月己亥帝至鄴都壬寅制經過郡縣迎奉乘輿
既供億以為勞宜旌酬而示寵應自東京至鄴沿路供
頓官員職掌等並與加恩載念雀臺昔居侯服撫綏六
郡臨蒞四年睽彼職員依然父老無恠推恩之典仍敦
尚齒之風鄴都並相澶貝博衛等州官員職掌內有頃
歲潛龍時在職者并與加恩管內耆老八十已上者並
與版授上佐

少帝以天福七年六月乙丑即位丁卯賜侍衛諸軍將校錢一百貫至五十貫以初即位示大賚也

七月庚子御正殿大赦內外臣寮侍衛諸軍將校及諸道節度使防禦團練刺史及諸道賓幕將校職員見任京官六品已下州縣官三司場院監治帶使額者並與加恩其諸道職員押衙已下與轉官兵馬使已下與轉職致仕官前任文武朝臣內諸司使已下前任節度使防禦團練刺史行軍賓從少尹上佐官前諸道都指揮

使已下前任京六品已下官及前資州縣官帶使額場院官等並與加恩應在京諸司職掌亦量與恩澤

八年七月丁酉幸南莊宣隨駕臣寮射于後園賜酒食物帛有差沿路農人各賜布衫袴并鞋負子共賜錢一十貫文

開運二年正月辛亥宴青州立功將校於永福殿賜李守貞符彥卿玉帶衣一襲衣著銀器鞍轡馬都監王景崇護聖廟主楊實都指揮使靳霸等各等第賜金銀帶

衣服疋段銀器等

漢高祖開運四年二月辛未即位於北京猶稱天福十二年是月戊寅以內外府庫賞犒諸軍將士有差甲午賜北京管內郡縣官員職掌各加階級乙酉北京管內及諸道相次有前資官六千七百人詣闕稱賀帝面加賚以遣之

六月甲子至東京戊辰大赦內外臣寮及京百司并諸道官吏將校等各具名銜申奏當與加恩

乾祐元年正月乙卯大赦改元應扈從鄴都文武臣寮
及諸軍將校并在京都署巡檢官員職掌諸軍將校等
除已行恩命外所有未曾加恩者宜令中書門下條舉
聞奏兼鄴都已來緣路州縣迎奉大駕供饋宿頓糧草
無遺闕處其職掌及州縣官吏並與等第甄錄

隱帝以乾祐元年二月辛巳即位癸巳大赦應中外文
武臣寮將吏各加恩寵其馬步諸軍兵士等各加賞給
周太祖廣順元年正月丁卯即位改元詔馬步諸軍將

士等各與等第超加恩命仍賜功臣名號已有功臣者
別與改賜内外文武臣寮致仕官諸軍將校隨使職員
及前任藩侯郡守文武朝列前内諸司使副使前禁軍
指揮使前資行軍副使等各與等第加恩

世宗以顯德元年正月南郊大赦内外馬步諸軍將士
各等第優賞應見内外文武職員諸軍將校致仕官
節度防禦團練刺史前任文武外朝官前内諸司使副
使前諸州行軍副使前指揮使諸道進奉專人前資官

赴郊廟陪位者并與加恩內外命婦并與追封因夫子
叙封者不得過夫子本品其諸寺監攝官如滿七周年
已上應奉公事無遺闕文書灼然者並與同明經出身
應祇應郊廟職掌人員並與恩澤其行事官已勘無違
碍者候銓司移省各與除官合來年集者候將來授任
仍並加一階欠三選至五選者減一選欠六選已上減
兩選幕職並與減一年如欠月限不及一年者便與除
官仍轉官資其諸色選人駁放皆依格勅其間小小違

碍可以情恕者并條奏以聞起今後升朝官兩任已上著綠十五周年者與賜緋著緋十五年者與賜紫凡州縣官歷任內曾經五度參選者雖未及十六考與授朝散大夫階年七十已上合授優散官者并賜緋其非時特恩不拘此例是月賜將相近臣主軍職員及郊裡冊尊號行事官等第分物

三月丁丑賜宰臣樞密使及諸軍都校鞍馬金玉帶衣服各有差辛巳大赦內外見任文武職官致仕官及諸

軍將校并與加恩其前任京官幕職州縣官至合授官
日施行

四年三月戊子朔帝在淮南宴文武從官於行宮賜招
討使李重進都監向訓等窄衣玉帶金銀器繒綵鞍馬
器甲等又賜諸將及行營軍士分物各有差



冊府元龜卷八十一